

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

SETEMA 2021

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

FAAPAIA MAOTA O LE GALUEGA EFKS ALAMAGOTO



Faletua o Sinuanua F. Nefu & Mafutaga Tina EFKS Alamagoto i luma o le Maota fou



Hon. Laauli Leuatea AF, Alex Letaa Devoe, Iosefa A. Uilelea FT(Taitaifono Fono Tele), ma Tina Valaaulia.

FAASINO UPU

1. O LE LAUGA	2
2. PEPA MAFUTAGA FAAFOUINA	3
3. O LE PEROFETA MULIMULI	7
4. LISI O E UA FAAMANUIAINAI LE KOLISI O MALUA	10
5. MAOTAEFKS ALAMAGOTO	11
6. FAATAUTAIGA O LE GATAIFALE	12
7. FUA MAI I FUA FAALEAGAGA	14
8. O E UA FAI I LAGI FOLAUGA	14
9. ATA O NISI MATAUPU LOMIA	16
10. MAINISI ITU O LE EKALEZIA	16

O LE LAUGA

TUSI FAITAU: Mareko 6 : 1 – 6

MATUA O LE LAUGA: Mareko 6:4, *“A ua fetalai atu Iesu ia te i latou, “E leai se perofeta e le mamalu, ua na o lona lava nuu, ma lona aiga, ma lona fale e le mamalu ai.”*

MANATU AUTŪ O LE LAUGA:

“A malu ā i fale, ua malu foi i fafo.”

A oo ina potopoto lo matou aiga i ni faalavelave, o ni maliu po o ni faaipoipoga, a o’o loa ina fai upu faai’u ma upu mulimuli, e ese lo’u fia faalogo i le upu lea, “A malu ā i fale, Ua malu foi i fafo.”

E ala ona manaia i le faalogo, auā o tua atu o ia upu, e mulimuli mai ai ma se pasese o le faifeau, ia po o sona faaoso foi.

E lē na o se faifeau foi e fai i ai, a e fai foi i tagata taualoa ma tagata tāua. E ave i ai le fa’aaloalo ma le tala, “A malu ā i fale, e malu foi i fafo.”

O se upu e faamatala ai le malu o le tagata i lona aiga. O le lotoifale pito sili lea ona saogalemu ma filemu, e malu ai le tagata. E amata mai fale, o le malu ā lenā, po o fea ā e alu i ai.

Peita’i, e i ai taimi o le olaga, e lē sologa lelei pea aso uma. E i ai ā faafitauli e tula’i mai ma oo ai ina eseese aiga, ona fefulituaa’i lea ma faitaga’i. Ona lē toe malu lea o le tagata i lona fale ma lona aiga.

A ua faapea le upu, “O si o ta lima lava ua pa’ia ai si o ta mata.” Ua lē toe malu, a ua mata pa’ia.

O se vaaiga foi lena na iloa i le lotoifale o Iesu, o lona Nuū, o lona Aiga ma ona tagata.

Ua tausolomua i latou ona tete’e ia Iesu. Ua lē malu Iesu i lona fale ma lona nuu.

Fai mai le tala a Mareko, Ua uma na a’oa’o Iesu i le Sapati, ona latou tausuai lea ia te Ia ma fai mai, po o fea e iloa mai ai e le atalii o le kamuta lenei potō?

O upu e fai e le tagata na te iloa lelei Iesu, o si ona lava nuu ma e na latou ola faatasi.

O le lotoifale lea o Iesu, lea ua latou faifai ia te Ia. O si ona lava lima lea ua toe pa’ia ai lona mata.

E sa’o ai le tala a Vaai Kolone na fai i lona uso, - E lē o se manu’a mai fafo, a o le manu’a mai fale. O si ona lava lotoifale, o si ona lava aiga, o si ona lava nuu.

O le tala foi lea na fai e Ioane i le amataga o lana Tusi, e faamatala ai Iesu. Fai mai, *“¹¹Ua maliu mai o ia i lona lava nuu, a e le’i talia o ia e ona lava tagata.”*

E lē o se manu’a mai fafo, a o le manu’a mai fale. O le mea lenā lea na fai ai e Iesu le tala, ‘E leai se perofeta e lē mamalu, na o lona lava aiga, ma lona nuu ma lona fale e lē mamalu ai’.

E lē iloa poo le ā le mafuaaga o lenei mea, ae pau le mea e iloa, o le vāvālalata o se mafutaga faalotoifale, pe faa-aiga foi. O le vāvālalata foi lenā, o le mafutaga ma le tiapolo. Auā o soo se mea e i ai le lelei e i ai foi ma leaga. O soo se mea e tafe ai le Alofa e tafe malosi ai foi ma le tiapolo.

O le ala lea o le faigofie ona malepe aiga, ma manunu le lotoifale, auā o loo i ai faatasi lava ma le tiapolo na te faatupu le lotoleaga ma le lotovale, e mafai ai ona masesei aiga.

A oo lā ina tatou vaavaai ia Iesu, ma lona i ai i le lalolagi, o lona lotoifale ā lea, na taulamua i lona oti, o ona soo, o lona nuu, o Faresaio, o Ositaulaga, o Tusiupu, o ē na vāvālalata ma Ia, o i latou ā ia na pa’ia ai le mata o Iesu. Ua lē malu i fale, ua lē malu foi i fafo. E lē o se manu’a mai fafo, a o le manu’a mai fale.

E i ai le faalupega o le tagata, na fai e le Aposetolo o Paulo. Fai mai, O outou tino, o le malumalu lea o le Agaga Paia, ua i totonu ia te outou. O se vaai faa-Aposetolo i le vā feagai o le tagata ma le Atua, lea e fai ai le tagata ma fale o le Atua. Ua uma Iesu, uma le Agaga Paia, e lē toe vaaia e le tagata.

Ae peita’i, e lagona e le tagata i lona loto le Afio ai o le Atua i lona tagata. E lagona e le Faatuatua, ma e vaaia foi le Atua i mata o le Faatuatua. O le avea lā o le tagata ma malumalu o le Atua, o le avea lava foi lea o le tagata ma lotoifale o le Atua. O le lotoifale e tataua ona malu ai ma le Atua.

O le fesili lā mo i tatou, O malu le Atua i lona lotoifale????

O malu le Atua ia i tatou???

Lea lava ua tatou iloa mai le amataga e le’i malu le Atua i lona Nuū, e le’i malu foi Iesu ma lona oo mai. Ae faape’i nei aso, i ō tatou taimi???

O malu le Atua i fale???

E leai ā se isi o tatou e malu atoatoa ai le Atua. Leaga o le olaga lenei tatou te i ai, e tumu i lu’itau o le ola

faatuatua. E lē moe le tiapolo. E lē vaivai foi le tiapolo, auā o soo se mea lelei, e i ai ā ma le leaga. O le upu a le Aposetolo o Paulo, E lē toe aiā tatou ia i tatou, auā ua uma ona faatau tatou e Iesu i le tau. O le fai lā o i tatou ma fale o le Atua, E lē pule ai tatou ia i tatou, ae ua pule ai le Atua. O le fale ua ofoina mo le Atua ina ia malu ai le Atua.

Fanau e a le Atua, o le faasoa lea mo i tatou i lenei masina.

“A malu le Atua i fale, ua malu foi i fafo.” O totonu i o tatou loto i le nofoaga o le Atua. E lē na o le Atua lā e fia nofo ai, ae o lā foi e su’esu’e avanoa ai le loto faamaualuga, ma le faasausili, o le fia tau ma sui ma le loto ita ae maise o le manatu faapito. O vaega uma ia a Satani, o loo taufao ma le Atua po o ai e pule i le tagata.

Peita’i e ui ā ina tatou iloa le vaega lea a Satani o loo taumafai mai, a e tatou te taliaina lava i o tatou loto ona o le loto fia faamalieina. O le vaivaiga lea o soo se tagata ma tatou uma, o le fia faamalieina o tatou loto, ona malie lea o tatou loto, a e fai ma ala e lē malu ai le Atua ia i tatou.

O le upu lava e fai i Faifeau, O le faafale lē malu i nuu ma afioaga.

Ou te talitonu, o se upu e faasino i apitaga o Faifeau i lā aso, “e faafale lē malu” e tutulu fale sa i ai.

A o nei aso, o fale pito sili ia ona lelei, i soo se nuu, ma ua lē toe tutulu fale o Faifeau.

E ui ā la ina lē toe tutulu fale o Faifeau i nei aso, a e o loo tumau pea ona faalupega “O le faafale lē malu.” O le ā lona uiga?

E lē faasino i le Faifeau le upu, a e faasino i le galuega la e sau ma le Faifeau.

Le upu a le Atua ma le finagalo o le Atua, o le mea lea ua faafale lē malu.

O lona uiga, e faafale lē malu ā lā le Atua i nuu uma. O nuu uma e i ai Ekalesia, o faalupe ai le upu lea “Faafale lē malu.”

E faasino i le lē malu o le Atua. O le lē malu o le Atua lava ia i loto ma agaga o tagata uma e aofia ai ma Faifeau. Ua lē malu le Atua, ae ua malu le tiapolo.

O se lu’i lea mo i tatou uma, Fai ia lelei o tatou fale. Ina ia malu ai le Atua. Saunia lelei o tatou loto mo le Atua. Tapena se fale lelei mo le Atua, e Afio ai le Atua a o tatou ola pea, auā a uma le ola nei, ona tatou o lea i le fale o le Atua e ta’u o le Fale e le’i faia e lima. O le fale faavavau.

Se isi ā i lē au i le Fale lenā.

AMENE.

*Saunia: Susuga Tesimeta Afamasaga FS
EFKS Fatausi, Pulega Safotulafai
Matagaluega FAASALELEAGA.*

PEPAMAFUTAGA **FAAFOUINA FAIFEAU,** **MALUA 2021**

Le Fofoaga a le Atua: O se Mataupu Silisili **o le ‘Alofa Tunoa’ po o le ‘Tausimea’?** **(God’s Creation: A Theology of Grace or** **Stewardship?)**

E muamua lava ona ou faatalofa atu i le paia ua sasao i le maota fono nei, faapea le mamalu o loo faafogafoga mai i atunuu mamao. I lau susuga i le Taitai, le nofo a Toeaina, le paia i le aufaigaluega tofofi, i susuga i Faafeagaiga, ma A’oa’o; faapea lau susuga i le Alii pule ma le aiga Faiaoga, ma le Laumua. Malo le soifua manuia ma le lagi e mamā.

Faatomuaga

O lenei pepa ua fa’aautū i le fofoaga a le Atua (*God’s creation*), e pei ona molimau ai le Tusi o Kenesel; ma o loo agai foi i ‘Mataupu Silisili Faa-Siosiomaga’ poo le *Ecotheology*. O loo taoto lava le tele o tamaoiga i manatu ma lagona ua fa’aalia, i le fofoaga matagofie ma le atoatoa na faia e le Atua. Le fofoaga na faia ai e le Atua le tagata e fai ma ‘Tausimea’ (*steward*) o Lana fofoaga. O lenei malamalamaaga ua mafai ona faaigoaina o le “*Stewardship Theology*” po o le “Mataupu Silisili Faa-Tausimea”. Peitai, o loo i ai foi mau a nisi, o loo taumafai ai e faamatala le fofoaga na faia e le Atua, e fa’aaoga ai le “*Theology of Grace*” po o le “Mataupu Silisili o le Alofa Tunoa”. O ni fesili faatupu manatu mo i tatou: Po o le ā se tāua o nei mau faa-mataupu silisili, i le va feagai ai o le tagata ma le siosiomaga? Ae po o le a foi sona tāua i le soifua faatuatua o le tagata?

E leai lava se atoaga o lenei tusiga, a e o se taumafaiga lava sei toe asia nei mau faa-mataupu silisili e lua, ma faamaite se fefaasoiga, i le tamaoiga o manatu ma lagona o lenei mafutaga, ma le faamoemoe e mau ai se feau tāua mo i tatou le au Kerisiano faatuatua.

(1) O se Popolega i le Siosiomaga: Mataupu Silisili Faa-Siosiomaga (Ecotheology)

Manatu tatou te ioe ma talitonu uma i le tulaga pagatia o loo ua i ai nei lo tatou siosiomaga (*environmental crisis*), e pei ona faailoa mai e lapataiga o suiga o le tau po o le *climate change*.

Ua tele foi tusitusiga ma manatu fa'aalia i le tāua o le silasila toto'a loa o le tagata i le tausiga lelei o le siosiomaga, e le gata mo i tatou i nei ona po, aemaise le humanai fai mai.

I totonu o le li'o o le au Kerisiano, ma le talafaasolopito o tusitusiga o mataupu silisili faa-siosiomaga, ua tele tagata ua faia ni tusitusiga e autū i le siosiomaga, ona o ni mafuaaga aoao tetele se lua. Muamua, o le fausia lea o ni manatu faa-mataupu silisili, e faataua ai le faasaoina ma le puipuia lelei ai o le siosiomaga. Lua, o le taumafai lea o tagata Kerisiano e tali atu i se tuuaiga, na tuuaia ai e Lynn White le lotu Kerisiano, fai mai o le lotu Kerisiano o le pogai lea o le tulaga pagatia ua i ai nei le siosiomaga, ona ua faa-ogatonu lava e le talitonuga Kerisiano le tagata (*Christianity is the root cause of the environmental crisis given its deeply anthropocentric orientation*). O mafuaaga aoao tetele lava ia na mafua ai loa ona agai tusitusiga a tagata Kerisiano i mataupu silisili faa-siosiomaga, amata mai i le tausaga 1970.

I ni taumafaiga la e tali atu ai i manatu o Lynn, ua agai tusitusiga a tagata Kerisiano e faamamafa le nafa tausi o le tagata soifua e pei ona faia ai e le Atua. E mafai ona tuufaatasia manatu o le nafa tausi o le tagata i le va nonofo ai ma le siosiomaga, i le mataupu silisili 'Faa-Tausimea' (*stewardship theology*).

(2) Mataupu Silisili Faa-Tausimea (Stewardship Theology)

I le Kenese 1:26 o loo ta'ua ai, “*Ona fetalai ane lea o le Atua, Ina tatou faia ia o le tagata i lo tatou faatusa, ia foliga ia i tatou*”. O le mau lenei i manatu o nisi, e ui e le o aumai tuusa'o, ae o loo atagia ai lava le nafa tausi o le tagata, e fai ma “**tausimea o le foafoaga**”. I se lagona o Rolando Tuazon; fai mai o le mau lenei o loo atagia ai le faasinomaga (*identity*), ma le nafa tausi (*responsibility*) o le tagata, i le va nonofo ai ma isi mea o le foafoaga. Ae o le a se faamatalaina o lea nafa tausi? I se manatu o Tuazon, afai ua faia le tagata ia foliga i le Atua, o lona uiga, ia atagia i le tagata le ola sogasogā (*creativity*), naunau i le faaeaina (*empowerment*), faamaoni (*integrity*), ma le alofa i le foafoaga (*care of creation*), e fai ma ona sao i le fo'ia ai o le faaaitaui o le siosiomaga. Afai ua foliga le tagata i le Atua, ia atagia la i le tagata uiga, ma amioga faa le Atua, i le va nonofo ai ma le siosiomaga. Ua o gatasi lava manatu o Tuazon ma Willis Jenkins, o loo ia faamatalaina le matafaioi faa-tausimea, e

ogatonu i le va fesootai o le tagata ma le Atua. E ao lava i le tagata ona faia o “tu ma aga faale-faatuatua” (*faithful practices*), i le va o le tagata ma le Atua. O tu foi ma aga faale-faatuatua, e iloga ai foi le tulaga tausimea o le tagata, i lona va ma le siosiomaga. O lona uiga i se manatu o Jenkins, o le faatuatua o le tagata, e ao lava foi ona faatino e ala i le alofa, ma le vaaia lelei o le siosiomaga.

Afai o lea le tulaga, o le mataupu silisili faa tausimea, e mafai ona faauigaina o le soifuaga atoa o le tagata Kerisiano. E le o se vaega, ae o le olaga atoa o le tagata Kerisiano (*not a part but the whole life of a Christian*). I totonu la o mataupu silisili faa-siosiomaga (*ecotheology*), o mataupu silisili faa-tausimea (*Stewardship Theology*), o loo faamamafa ai le soifua faatuatua, le ola amanaia, faatasi ai ma le alofa o le tagata i isi vaega o le foafoaga a le Atua. I so'u lagona vaivai, e taua tele lenei mataupu silisili i le soifua o le tagata Kerisiano, ae maise ai lava la tatou taumafaiga e foia le faaaitaui o le faatama'iaina, ma le soona fa'aaoga faalētatau o le siosiomaga. Peitai, o loo i ai lava atugaluga a nisi i lenei mataupu silisili. Lea o le a ootoo atu i lalo.

(i) Faaseā/Faatupumanatu (critique) i Mataupu Silisili Faa-Tausimea

E lua lava ni faamoemoe aoao tetele e ala ai ona faia ni faaseā po o ni vaaiga-faatupumanatu o mataupu silisili faa-siosiomaga (*ecological critical evaluation*). Muamua, ina ia faia se faatupumanatu (*critique*) faa-siosiomaga, i le olaga faa-Kerisiano; lua, ina ia faia se faatupumanatu faa-Kerisiano i le soona faatama'ia o le siosiomaga. I ni atugaluga o nisi o le au suesue, ua faailoa ai lo latou popolega i le faauigaina e nisi o vaega o le Kenese 1:26, 28. I ō latou manatu, e mafai ona faauiga sesē lenei mau o le Kenese, e fai ma ala e manatu ai le tagata o ia o le 'palealii' o le foafoaga (*crown of creation*), o ia foi e pule i le foafoaga; ma faia ai loa faatinoga o le pule sauā. E pei ona ta'ua i luga, o faauigaga ia o loo faavae ai le tuuaiga e Lynn White o le lotu Kerisiano, o le pogai tonu lea o le tulaga pagatia ua i ai nei le siosiomaga. Ae a toe faitau foi ma malamalama i le tala o le foafoaga (Kenese 1:1-2:4), e leai lava se vaipanoa o le tala o ta'ua ai le upu tausimea/*stewardship*. I mau a nisi, o le mataupu silisili lea na tupuga mai ina ua taumafai James Barr e tali atu i tuuaiga a Lynn White, faapea foi le naunautaiaga o Barr, ina ia aumai i se ata o le *tausimea*, le matautia o le gagana o loo fa'aaogaina i le tala, i upu ua faaperetaniaina o le 'dominion' ma le 'subdue'.

Ua talitonu foi lenei pepa, ua se'e ese i tatou mai lenei faauigaga, o loo faamamafa ai le pule a le tagata, ma talitonu ai le tagata o ia o le 'palealii' o le foafoaga. O le ala lea e tāua ai le vaai 'faa-tausimea' ae lē o le 'pule'. Peitai ane, o loo i ai lava foi ni nai vala e ono lape ai le vaaiga faa-tausimea. I se mau na tusia e se tasi tusitala lauiloa o mataupu silisili faa-siosiomaga, o Joseph Sittler, na ia faapea ai:

“e manaia ma lelei le mataupu silisili faa-tausimea; peitai, e le lava lea e tali atoa ai faafitauli o le siosiomaga. O lona uiga, ua na o le mataupu silisili lava o le alofa tunoa (*Doctrine of Grace*), e mafai ona fausia ai ni manatu e sagatonu ai mafaufauga ma faatinoga faa-Kerisiano, e tali ai i faafitauli o le siosiomaga”.

I se lagona o Sittler, o le foafoaga o le li'o lava o le Alofa Tunoa (*The creation itself is a realm of grace*).

O le aoao tetele o popolega o i latou nei, o le mataupu silisili faa-tausimea, o loo ogatotonu lava le tagata i le faiga o le nafa o le 'tausi'. I se lagona o lenei pepa, e tāua la tatou galuega 'tausi'. Auā e ave ai le faamamafa o le tagata i lana galuega faa-tausimea i le foafoaga. Peitai ane, e mafai foi ona avea ma ala e una'ia ai isi mea o le foafoaga, e fai ma mea e lē tāua. Faataitaiga, afai e manatu le tagata o ia e tausia fanua ma eleele, e mafai lā ona peiseai o eleele ma fanua, na faia lava e le Atua mo *na o* le fa'aaogaina e le tagata. Peiseai o le siosiomaga, o se manu o loo moomia ona faanofofilemu (*beast needed to be tamed*). E faapea foi i manu ma laau. O i tonu, o loo manatu lenei pepa, e ona ama ai se taumafaiga o le mataupu silisili faa-tausimea. O lona uiga, e lelei le avea ma tausimea, ae e lē o i ai tele se 'reciprocity' po o se vaaiga e ola fe'oe'oea'i ai le tagata, ma isi mea o le foafoaga. Ae a manatu foi i le tulaga mā'ale'ale ua i ai nei le siosiomaga, atonu lava e tāua foi le vaaiga i se isi mataupu silisili (*alternative*), i lā tatou taumafaiga e foia le faafitauli o le siosiomaga (*environmental crisis*).

E lē o se manatu o lenei pepa, e itiiti le tāua o le tagata ma lana galuega 'tausimea' i le foafoaga, ae maise ai le galuega foafoa a le Atua na faia ai le tagata. Peitai, e ao lava ona iloa e le tagata lona tulaga i totonu o le foafoaga na faia e le Atua. A tusa ma le manatu o Sittler o loo taua i luga, o le tagata e faatauvaava lava, peitai ua na o le mataupu silisili lava o le Alofa Tunoa (*theology of Grace*) e mafai ona

atoa ai sa tatou tali atu i faafitauli o le siosiomaga ua i ai nei.

(3) Mataupu Silisili Faa-Alofa Tunoa ma le Siosiomaga (*Grace Theology in Ecology*)

O le foafoaga na faia e le Atua, na faia lava i lona Alofa Tunoa. Pe faapefea ona iloa lea tulaga? E lua lava ni vaega tatou te iloa ai o loo fia faamamafaina: Tatou te iloa i le tala o le foafoaga, o loo atagia ai lona Alofa Tunoa. Tatou te iloa foi i tala ia Iesu Keriso, le fa'aaliga manino o le Alofa Tunoa o le Atua, lea o loo puaina mai ai elemeni o le siosiomaga ma lona tāua.

I totonu o le tala o le foafoaga a le Kenese, o loo atagia ai foi foliga o le Alofa Tunoa o le Atua. O loo manino lava lea tulaga i le amataga o Kenese (1:2). Auā o loo ta'ua, “*Sa soona nunumi le lalolagi ma ua gaogao; sa ufitia foi le moana i le pouliuli; na fegaoioia'i foi le Agaga o le Atua i le fogātai*”. E ui o lea e lei faia le foafoaga, ao lea ua faailoa mai e le tusitala le Alofa Tunoa o le Atua. Auā o le 'fegaoioia'i' ai o le Agaga o le Atua i le fogātai, e mafai ona faatusaina i se aeto ua faapepepepe i luga a'e o lana toloai. Pei lava o le moa e ofaofata'i i lana toloa'i.

O le faamanuia foi a le Atua i le tagata (Kenese 1:28), “*ia uluola, ma ia tumu ai le lalolagi*”, e lē o le tagata na muamua ai, auā na ta'ua muamua lenei faamanuia mo 'i'a ma manulele' i le Kenese 1:22. I se manatu o Ellen Davis, e ao lava i le tagata ona talia o ia e tulaga ese (*unique*), ae e fesootai lelei ma isi mea o le foafoaga. Auā o mea uma o le foafoaga o loo taua e Kenese, ua silasila atu ai le Atua “*ua lelei*”.

O le fesootaiga lea e lē sili atu, ae tutusa lelei le taua o le tagata ma isi mea o le foafoaga. O lona uiga i se manatu o Davis, e taua le vaai tutusa (*reciprocal*) o le tagata i isi mea o le foafoaga, e talia ai e le tagata lona tulaga i le foafoaga, e fesootai uma mea o le foafoaga na faia e le Atua. Faatāua foi e Davis le vaai faa-taofiofimamau (*restraint*). O lona uiga, o le iloa e le tagata o lona tulaga i le foafoaga, o le iloa lea ona taofiofimamau i le soona fa'aaoga o mea o le natura (*Restrain from consuming nature*).

O le faamatalaina foi e le tusitala o le galuega foafoa a le Atua, lea lava e pei o loo fetalai fetalai a le Atua ma le siosiomaga. E fetalai le Atua, ae tali le siosiomaga.

O lona uiga, o loo atagia ai le Atua tuu avanoa, ma alofa i le foafoaga na Ia faia. Ua tatou iloa foi le aluga o le tala atoa o Kenese, le natura o le Atua o le 'toe-foafoa' (*God recreates*). Auā na manaia ma lelei le foafoaga, na faatoilaloina foi, ma le faamoemoe ina ia toe faatupu ma toe-foafoa. O le Atua Alofa Tunoa lava lea.

(i) Iesu Keriso ma le Siosiomaga

O le faamatalaina o le Alofa Tunoa o le Atua, e laualuga ma ogatotonu lava i le soifuaga o Iesu Keriso, o lona maliu ma lona toetu manumalo mai le oti ma le tuugamau - o le Atua liutino tagata. Peitai ua o tatou talia foi i le faatuatua, o le Atua, o ia lava o le Alofa Tunoa. O lona uiga, o le foafoaga foi na faia e Atua, o le fa'aalia lava lea o lona mamalu, o lona silisili ese, ma lona alofa tunoa. Afai o lea le mau ua talia lautele, o lona uiga, o mea uma o le foafoaga, e aofia ai ma le tagata, o mea uma ia e ao ona atagia ai le alofa tunoa o le Atua.

O le malamalamaina o le siosiomaga i le Alofa Tunoa, o loo tu mati'e ai lava le faaolataga na faia e le Atua e ala ia Iesu Keriso. E tusa ma le molimau a Paulo ia Kolose (1:17), O Iesu Keriso, "*O ia foi o le uluai o mea uma lava, o loo faatumauina foi mea uma lava ia te ia*". O lona uiga, o mea uma lava o le foafoaga, ua fa'aalia manino i le Keriso Toetu.

I se toe faitauga o le maliu o Iesu e tusa ma le molimau a Mareko. O loo faamatalaina ai e Susan Miller le Mareko 15:33 ("*Ua oo i le tutonu o le la, ona pogisa uma ai lea o le nuu, ua oo lava i le itula e tolu*"), i le tagi a le natura. I se manatu o Miller:

O le oo ifo o le pogisa i le fanua, na feagai tonu ai le natura ma puapuaga o Iesu. I totonu o le tolu itula, ua lē lagona ai se leo o tagata. Ua ese lava lea ma leo faatauemu na lagona muamua. O lona uiga, ua lē o toe tagitu'i tagata, a ua tagi le natura.

O lona uiga, i le taimi o le maliu o Iesu, le taimi o loo faatino le Alofa Tunoa o le Atua i le lalolagi, lea lava foi sa lagona ai le leo o le siosiomaga, e au faatasi ma leo o i latou na molimauina le maliu o le Faaola. E mafai la ona faapea, ole maliu o Iesu, o le vaega o le faaolataga o loo atagia ai le Alofa Tunoa o le Atua, o loo auai faatasi ai le tagata ma le siosiomaga, e auē faatasi i tiga o le Alii Faaola. I le faamatalaina foi o le toetu mai o Keriso, o le maa lava o le tuugamau avanoa, le faailoga o lona toetu manumalo, le maa o

le siosiomaga na fuli ese, auā le faamoemoe o le toetu (Mareko 16:4; Luka 24:2).

O se manatu laualuga, le fa'aalia o le Alofa Tunoa o le Atua, lea o loo i ai ma le elemeni o le natura i totonu o lona malamalama'aga. A ua faamausalī atili ai le mau, o le tagata ma le siosiomaga, e fesootai ma vavalalata lava le la va nonofo ai, pe a faamatalaina i le alofa tunoa.

O loo faamatalaina foi e Gary Burge, le galuega tala'i a Iesu Keriso e tusa ma le molimau a Ioane. Fai mai Burge, o Tusi o le au Sinopi, o loo faamatala ai le malaga tuusa'o a Iesu mai Kalilaia, taunuu ai i Ierusalem. Peitai o le Evagelia a Ioane, e lē o faataua ai e Ioane le tala faasolopito ae o se vaai faa mataupu silisili, auā o loo atagia i mau a Ioane, e faafā na i ai Iesu i Ierusalem i lana galuega tala'i (2:13; 5:1; 12:12; 10:22). O lona uiga, e mafai ona faapea na fefoifoa'i le Alii Faaola i le va o Kalilaia ma Ierusalem, e tusa ma le molimau a Ioane. I se vaai faa mataupu silisili, e mafai ona faapea o loo atagia ai le alofa o Iesu i lona nuu moni o Nasareta i Kalilaia. I se isi manatu, le nuu paia o Ierusalem, ua le o toe tāua, auā o lea ua atoa ia Iesu le nuu paia. O Iesu lava le nuu paia. Le siosiomaga paia, lea ua atoa ia Iesu.

O lona uiga, o Iesu Keriso, le ogatotonu o le alofa tunoa o le Atua, lea ua atoa i ai fanua ma eleele o tagata Iutaia. Ae o se atoaga foi lea o le malamalamaaga o le siosiomaga, i le mataupu silisili o le Alofa Tunoa. E lē ogatotonu le tagata, ae ogatotonu ai le Atua o le alofa tunoa.

Upu Faaiu

Afai o le tala o le foafoaga, na tuufaatasia ma le naunautaiga ina ia toe faamausalī le faamoemoe o Isaraelu i le va nonofo ai ma le Atua ao faatafea ai i Papelonia; o lona uiga o loo ta'u atu ai foi ma lona alofa tunoa i lenei tala. O loo manino lava le mataupu silisili o le alofa tunoa i le tala o le foafoaga. E le gata mo le tala o le foafoaga, ae faapea foi le tala o le faaolataga a Iesu Keriso, o loo lotolotoi ai lava ma elemeni o le siosiomaga. I so'u lagona vaivai, o la tatou va nonofo ai ma le siosiomaga, ina ia tausia lelei e le gata mo i tatou, faapea le lumanai; e ui e faatauva le tagata, ae ua mafai ona atoa, i le mataupu silisili o le alofa tunoa.

*Saunia susuga Esera Esera (FFM)
Faia'oga Kolisi Faafai'ea Malua*

O LE PEROFETA MULIMULI

(O se tala faa-fagogo ua faaSamoaia mai le tusi The Last Oracle, tusia e James Rollins)

MATAUPU II

Mati, 1959.

Atu Mauga o Karapatiano.

Romania.

Na oso ese i fafo le alii o Iuri Raeva mai lana loli o le ituaiga Rusia ZiS-151, ma tu i luga o le auala palapalā. O ona vae o loo gatete i ona lalo ifo. Ina ia faasagatonu lana tu, na faalagolago atu le isi ona lima i luga o le faitoto'a u'amea lanu meamata o le loli malepe, o loo gugulu faaseā ma toe faafetai foi. O a'afiaga o le faigamalaga sa a'e i mauga mo le vaiaso atoa, o loo lagonaina ai pea le tigā o lona tuasivi. E oo i ona gao sa peisea'i e maluelue i totonu o lona ulu. Ui i lea, o le taavale malepelepe leni ua na mafai ai ona latou a'e mai i luga i le auala ma'ā ma fepi'opi'oa'i solo, e lofia i le tatafe o vai, seia taunuu mai i leni nofoaga o toluapiga i tau mālūlū.

Na ia tepa atu i luga a'e o lona tau'au, a o patatū ifo i lalo le faitoto'a o le itu i tua o le loli. O fitafita i toniga papa'e ma uliuli sa feosofi mai ai i fafo. O latou teuga faapitoa mo le mafanafana sa fefiloi ma le kiona faapea maamora o le vaomatua. O loo faaopeopea lava puao o le taeao i le tele o vaega avanoa e pei ni aitu faanoanoa.

Na mananū le lauvale a fitafita a o tātā ma tūtū solo o latou seevae māfiafia. Na fe'emo solo aloiafi o tapa'a e lafoa'i pe solia i mulivae. Na lagona le tatagi pa'ō o u'amea a o sauni a latou la'au malosi o le ituaiga Kalasinikovi. Peitai, o i latou ua na o ni leoleo e pito i tua, e taofi ma tete'e ese tagata uma.

Na toe faasaga i luma Iuri ina ua savali mai le ta'ita'i lagolago o le vaega, le alii Lutena o Toporisi. O se tagata mai Ukureni e lapo'a, o ona fofoga faapei o se taga ma le isu e ta'e, e la'ei i ofu o le mālūlū togitasi faa-fitafita. O loo pipi'i faataamilomilo pea lana mea-vā'ai lanu mūmū i ona mata.

“Lau afioga i le Ta'ita'i, o lea ua mautū ma malu puipuaia le apitaga.”

“O i latou tonu nei? Tagata ia o tatou sailia?”

Sa faamimigi tau'au o Toporisi, faitalia Iuri ma fai le filifiliga. Ua uma ona latou fetai'a i muamua ma se isi faailo sesē, na latou osofa'ia ai se isi apitaga o nai tagata matitiva, sa tau saili ni mea e ola ai e ala i le 'eliina o papa. Na tomumu Iuri. O nei mauga e mai

se isi vaitau, le Augatupulaga o Ma'a, e māotua, e faatumulia i talitonuga faanuupō ma le mativa. Peitai o nei nofoaga pogisa i vaomatua maualuluga, o ni lafitaga e sili ona talafeagai lelei mo i latou e manana'o o sulufa'i ma 'aua ne'i maua e nisi.

Na sitepu ese Iuri ma iloilo toto'a le pi'oga o āsaga pogisa sa fai ma auala. O le palapala ma le kiona ua fe'eli ma asu uma i luga e taavale na muamua mai. E ui atu i totonu o laau. Na iloa atu e Iuri ni uila-afi pe luasefulu, e tofu ma le fitafita faa-aupegaina o loo nonofo ai i taavale e pipii ai i autafa. O pasika mamafa na muamua taunuu mai ma si'o le nofoaga, ia mautinoa e leai se tasi e mafai ona sola ese.

O tala fe'vea'i solo ma molimau o sauaga na faapogai ma ta'ita'iina mai ai latou i leni nofoaga tuufua. Ma o lea lava sa mana'omia le sasaina o le vaomatua ma susunu nisi aiga, ia faamafanafanaina ai latou e maua i le laulaufaiva malō ma aisā. E toaititi e manana'o e tautatala faailoa faamatalaga faasino i le ituaiga Kapatia o Romania. Ae maise lava i tala e uiga i le ituaiga leni e tūvao, tūese ma tūtasi, o femusua'iga o aitu fetolofi ma aitu fe'ai. O agaga leaga ma faataulāitu.

A e mata o lea ua i'u ina maua mulimuli ane?

Na fesuia'i solo seevae o Lutena Toporosi. “O le ā le mea a fai nei, lau susuga i le Ta'ita'i?”

Na lagona atu e Iuri le fesuia'iga 'o'ona i laugutu o le Ukureni. E ui ina o Iuri o se Ta'ita'i i le vaega'au o le Sovieti, a e lē o ia o se fitafita. E pu'upu'u teisi o ia nai lo Toporosi, faatasi ma si ona manava ua faasolo ina puta ma ona foliga sesega. Na siitia o ia mai le Lunivesite o le Setete o Lenikarate, ona faasolo a'e ai lea i luga o lona tulaga i tofiga faa-militeri e ala i ona lālā faasaienisi. E aulia ane lona luasefuluvalu tausaga, ua uma ona tofia o ia e faa-ao i ai le vaega o su'esu'ega faasaienisi, i le Matagaluega e Pulea Su'esu'ega Faasaienisi, Faafoma'i ma Soifuaga o Meaola.

“O fea o i ai Kapeteni Maratovi?” na fesili ai Iuri. O le sui o le Militeli Vaega'au a le Sovieti, e seāseā ona ia tu'ua autafa o Toporisi, ma e vaai ona mata faa-ofisa i soo se mataupu.

“O loo faatali mai ia i tatou i le faitoto'a o le toluapiga.”

Na āsa atu e Toporosi le gasū o le ala sa'onoa i lona ogatotonu. A o Iuri ua faatafa ese, i le vaega o le

eleele o loo aisā ma faigofie i le savali. Ina ua taunuu atu i le pi'oga mulimuli, ona tusi lea o le lima o le Lutena faasino i se tolauapiga o loo ufitia e ni papa 'alā ma si'omia e laau uli.

“O tagata Kipisi”, na tomumu ane ai Toporosi. “E pei ona sa e faatonuina, e ā?”

Ae mata o le ituaiga Romania tonu lea?

O luma atu, o iloa atu ai taavaletoso a Kipisi sa vali lanu meamata ma uliuli, ma ona uili uumi e pei o Iuri. O nisi vali ua masaesae ma to'ulu ese, na iloa atu ai isi vali lanu malolosi sa natia i tua atu, o faailoga o aso sa sologa lelei. O taavaletoso uumi na faaputu ai le kiona i ona luga, ma faaputuga aisa i o latou autafa. O faamalama sa nenefu i le mālūlū o le tau. Na iloa ta'iga-afi tuai i le uli o malala ma fafie. E lua nisi afi sa mumū ma ola i le maototonu o le togalauapi, na suluia ai ataata e oo i le tumutumu o taavaletoso. O se tasi taavaletoso na tu malepelepe ua mū uma e oo i ona pa'u. I le tasi itu, na tutū ane ai ni solofanua o faatautau mai o latou ulu mai lalo ifo o tōega o ni laupapa malepe ma faaputuga maa. Sa i ai ma ni 'oti ma ni mamoe sa taali' o solo ai i le togalauapiga.

Ua si'o atoā e fitafita le fanua ma le nofoaga. O tino oti o nai tagata toaititi e lavalava masaesae ma ofu mafanafana, sa taatitia solo i 'ī ma 'ō. E feoloolo i latou o loo ola. O tagata o le tolauapiga na tatoso faamalosi mai o latou taavaletoso ma fale'ie.

Na lagona atu le si'isi'i o le tauvalaau mai totonu o le tolauapiga a o tau faapotopoto mai le vaega mulimuli o Kipisi. Na lagona atu foi faatasi ma le taolo mai o pulufana. O Kalasinikovi. Na mata'itū e Iuri le faapotopotoga mata faanoanoa. O nisi fafine sa tootutuli, taumasūsū. O tamauli sa pei o u'amea le malō o la latou maitauina o tagata ese nei ua osofaia i latou. O le toatele sa lavatoto, manunu'a ma gauia o latou lima.

“O fea o i ai uma tamaiti?” na fesili ai Iuri.

O le tali na sau mai le isi ona itu, e manino ma ma'ale'ale e pei o le 'aisa o loo feagia'i i nei nofoaga maualuluga. “O loo puipuaia i totonu o le malumalu.” Na liliu atu Iuri e fesaga'i ma le tagata na tautala mai, Kapeteni Savina Maratovi, le ofisa o faatofalaiga a le misiona. O le tamaita'i sa ufitia i lona ofu mafanafana ma le pulou mafiafia. O lona lauulu lanu uliuli sa fetau lelei le pea ma lona pulou fausia mai pa'u o le luko Rusia.

Na ia tusi lona ogālīma mālū faasino i le tumutumu o se maota o loo aliali mai i tua atu o taavaletoso ma lenei nofoaga. Na gaosia i maa e maua lava i le fanua

ma ua lalago faatasi ai le malumalu ma papa o loo si'osi'omia ai.

“Ua leva ona faapotopoto tamaiti i totonu o le fale a e tatou te le'i taunuu mai,” na faamanatu atu ai e Savina.

Sa luelue le ulu o Toporosi. “E lē taumate na latou lagona atu le leo o afi o pasika.”

Na feiloa'i le pupula a Savina ma le vaai a Iuri. Na patilima ma sivasiva le pupula o le taeao i ona laufofoga lanu lauvao.

Sa i ai lava mafaufauga o le ofisa o faatofalaiga ia. O Savina o ia lea na tuuina atu faamaumauga o lipoti tau le su'esu'ega i le a'oga a Iuri, o tusitusiga ma le anoanoa'i o mau mai le Auseuita-Pirekenau, e patino tonu i le galuega a le Foma'i o Iosefa Menagele, le “Agelu o le Oti” o le tolauapiga.

Sa tele ni miti leaga na afu mālūlū ai Iuri i le mae'a ai ona ia faitau i nei lipoti. Sa lauiloa Foma'i Menagele i lona faatinoina o soo se ituaiga faata'ita'iga mata'utia i pagotā, a e o lenei manu sauā sa i ai lava lona sogasogā faapitoa mo tagata Kipisi, a e maise lava i a latou fanau. Na te faalataina i latou i lola ma sukalati. Na ala ai ona latou valaau ma faaigoā ia te ia o “Unite Papa”. Na fai nei mea uma ina ia faasufi tamaiti ia faigofie ona usita'i ma lagolago. A e mulimuli ane, na ia matua'i fasiotia uma i latou pei ni manu – ina ua uma ona ia maua, se masaga Kipisi tulaga ese. O se masaga teine tutusa lelei. O Sasa ma Meena. Na faitau e Iuri nei lipoti ma faamatalaga, i lona maofa faatasi ma lona matua'i fefe.

Sa faamauina e Menagele ni faamatalaga ma'ale'ale faasino i le masaga maoa'e: o tausaga ma tala faasolopito o la aiga, tupu'aga, ma faasinomaga. Na ia sauāina ma faatigaina aiga o nei tamaiti, ina ia maua mai le tele o faamatalaga natia, ma faamaonia i su'esu'ega ma ta'otoga o le masaga e fai ai faata'ita'iga. Sa faanatinati ma faateleina e Menagele ana su'esu'ega. Peitai a o faasolo ina ola le taua, sa faamalosiā ai o ia e faamuta loa ana sailiiliga. Na ia fasiotia le masaga e ala i le tui o vailaau oona i o la'ua fatu.

Sa tusi tau ōloōlo e Menagele lona atugaluga e lata i le faai'uga o lana lipoti.

Pe ana lava so'u taimi...

“Ua e sauni?” o le fesili atu lea a Savina ia Iuri.

Na luelue lona ulu. Na faafeao e Toporosi ma se isi fitafita, a o aga'i atu le pealua i totonu o le tolauapiga. Na ia la'a ese mai se tino maliu sa taatia faō i totonu o se faaputuga toto ua to'a.

Ua aliali mai le malumalu i luma atu. Ua na o se faaputuga maa, leai ni faamalama. O se faitoto'a e tasi o loo tapunia, fausia i utupoto tutu'a na tatipi mai laau malolosi, saisai ma fusia i uaea apamemea. O le fale e foliga i se 'olo a e lē o se malumalu. E toalua ni fitafita sa tutū ai i autafa o faitoto'a ma se tu'ipala u'amea.

Na tepa atu Toporosi ia Iuri. Na luelue lona ulu. "Talepe i lalo!" o le faatonuga lea a le lutena.

Sa faapena ona lia'i atu e fitafita le tu'ipala ma taia ai le faitoto'a. Sa felelei solo fasi laupapa. Sa mafai ona tu pea ma tapuni i isi lia'i e lua na taia ai. Ae na i'u lava ina malepe ma matala le faitoto'a ma le gapā e pei se faititili.

Na faatulou ane Iuri ia Savina ma laa atu i luma.

Na suluia le lotoifale pogisā i nai mōlī laiti. Na laina faasolo ai nofoa i itu e lua, e aga'i atu i se fata faitaulaga maua. Ma le toatele o tamaiti e eseese le matutua, na faapouluulu ai i luga o nofoa, sāo aunoa ma se pisa.

A o aga'i atu Iuri i le fata faitaulaga na ia vaavaai ma iloilo i tamaiti. O le toatele o i latou sa iloga ai faailoga mata'utia o le lē atoatoa: o se ulu e itiiti foliga pei se pine, o laugutu mumutu pe māvaevae, o sa'a ma ē pupu'u. O se isi tamaitiiti e leai atoa ni lima, na o le tino. O fefaausuaiga o neura.

Na lagona e le pa'u o Iuri le lē nofo lelei. E leitioa tagata e nonofo i taulaga ma aai ona latou fefefe i le ituaiga lenei o Romania, i faamatalaga o talatu'u i agaga, aitu ma sau'ai.

"E faapefea ona e iloa o tamaiti tonu nei?" o le fesili lea a Savina ma le manino o le inoino i lona leo.

Na siitia e Iuri mai se faatalatalanoaga faasauā na faamauiina e Menagele. "O le ana o kovihani." O le nofoaga na fananau ai le masaga teine, o se mea lilo sa taofiofi mamau e le au Kipisi i le talaaga faasolo i tua i le foafoaga mai o ituaiga.

"O i latou nei?" na naunau atu ai pea Savina.

Sa lūlū le ulu o Iuri. "Ou te lē iloa."

Na ia fa'aaauu atu i se tasi o teineitiiti sa nofo mai i luma o le fata. Sa ia taofi mau i se pepe mea taalo ma fusi atu i lona fatafata, e ui ina o lona lava ofu sa feoloolo atu nai lo le ofu o lana pepe. A o faalatalata atu Iuri, na ia maitauina o le teine e matuā atoatoa, e aunoa ma se faailoga o le tino lē atoatoa. I le tau pulapula o le malamalama, sa iloa manino atu ai le pupula pei se tioata o ona mata. O se mea e tulaga ese e lē maua soo i le au Romania. E pei o le masaga, o Sasa ma Meena. Na tootuli atu Iuri i ona luma.

E le'i ano ane i ai le teine. O lana pupula sa alu sa'o loa, ui pasi atu ia Iuri. Na ia lagona e i ai se mea sesē faasino i lenei teineitiiti, sili atu le ogaoga nai lo isi ituaiga faalētonu o le tino ma le mafaufau.

E ui ina e le'i foliga tau ma'ati'ati lana vaai, a e sa ia si'i a'e lona lima ia Iuri. "Unite Papa," na ia tautala ane ai i se leo manifinifi i le gagana Romania.

Na totogo a'e lagona o le fefe ia Iuri. Unite Papa. O le igoa fagafao lea mo Iosefa Menagele. Sa fa'aaogā ma valaau ai e tamaiti uma o Kipisi. Peita'i o nei tamaiti e laiti tele latou te le'i vaai tino i le anofale o se togāluapiga mo sauāga faamanu.

Na sīōa atu Iuri i totonu o mata gaogao. Pe o iloa e le tamaiti lenei le mea o loo fuafuaina e Iuri ma lana vaega 'au su'esu'e? E faapefea ona ia iloa? Na ufitia o ia i le fefe i upu a Menagele:

Pe ana lava so'u taimi...

Ua lē o se faafitauli lea mo Iuri. O le a tuuina i lana vaega le taimi atoa latou te mana'omia. O lea ua amata ona fausia le nofoaga mo su'esu'ega. E mamao lava mai mata o le fia iloa.

Na faalatalata ane Savina. Sa ia mana'omia se tali. O loo iloa e Iuri le mea moni; na ia iloa lava mai le taimi na ia faataupupula ai i totonu o foliga o lenei teineitiiti. Ae sa ia faatalitali teisi.

Na faata'oto atu le lima o Savina i luga o lona tau'au. "Lau afioga i le Ta'ita'i?"

Ua leai se toe foi i tua, ona luelue lea o le ulu o Iuri, e faamaonia ai le mea mata'utia o le a tupu."Ia. O i latou nei o le au Kovihani."

"Ua e mautinoa lelei?"

Sa toe luelue le ulu o Iuri, ae na taula'i pea lana pulato'a i mata lanu moana o le teineitiiti. Na te le'i lagona lelei atu le faatonuga a Savina na fai ia Toporosi: "Ia tuu uma na o tamaiti i luga o loli. Faalalo uma isi tagata."

E le'i faalavelave Iuri e taofi le faatonuga. Na ia iloa lelei le faamoemoe na latou o mai ai iinei.

Sa faaloaloa ane pea e le teineitiiti lona lima. "Unite Papa," na ia toe fai ane ai.

Na ia tago ane ma opoopo atu tamatama'ilima laiti i ona lava lima. Ua leai se toe faanefu, se toe faafiti i le taimi nei, leai se toe foi i tua.

Ioe, o a'u lea.

(Sosoo atu Sulu Samoa Oketopa 2021)

O Ē UA FAAMANUIAINA I LE SUEGA ULUFALE

I MALUA 2021

SUAFA

1. Andrew Jr. Fui Taotofi
2. Benjamin Tuia
3. Efi Aloaina
4. Esera Iafeta Paulo
5. Faafetai Alaifue
6. Faafouina Jr. Samuelu
7. Gafatasimalo Foaga
8. Galovale Vili Operu
9. Junior Sanerivi
10. Junior Saolotoga
11. Kereta Toomata
12. Lauina Tevaga Sofe
13. Liaina Mauga
14. Mareko Seuamuli Fasi
15. Marini Jason Setefano
16. Melila Faasalafa
17. Patamo Soa
18. Petaia Junior Taufao
19. Poao Jr. Seti Laufiso
20. Pou'oa To'a
21. Sapati Sapati
22. Taualeoo Tusani
23. Tuaovaigafa Lui Ale
24. Tapito Sanerivi
25. Taviuni Salele
26. Viliamu Sialeipata Viliamu

MATAGALUEGA

- Aukilani
- Ituotane
- Niu Sila i Saute
- Faasaleleaga
- Apia i Sasa'e
- Apia i Sasa'e
- Aukilani
- Aukilani
- Laumua o Aotearoa
- Malua
- Niusaelese
- Ituotane
- Malua
- Ituotane
- Kuiniselani
- Faasaleleaga
- Hawaii
- Kuiniselani
- Amerika
- Lotofaga-Lepa-Aleipata
- Aana
- Aana
- Lotofaga-Lepa-Aleipata
- Ituotane
- Faasaleleaga
- Apia i Sasa'e

FAAPAIA MAOTA GALUEGA EFKS ALAMAGOTO

O le aso 11 Setema 2021 na faapa'ia ai le Maota o le Galuega a le EFKS Alamagoto, o loo susū ai le susuga Faatafa Nefu FS ma le faletua ia Sinuanua, faapea le mamalu o le Ekalesia auā le afio o Alo o Sina, le Fuaifale o Salevalasi, le mamalu o le Faletolu ma le Vainalepa ma upu ia Tuisamau. O le susuga Talalelei Tuafafo FS (EFKS Mulinuu) na ta'ita'i le sauniga, talu ai ona o loo tō'esea le toeaina o le Pulega Apia Sisifo, susuga Efu Efu FT. Na faavae le lauga o le viiga i le Atua, o le faamalo ma le faafetai i le Aulotu, o le faamanuia ma le faamalosi'au a le ta'ita'i, i le Salamo 15:1-5, *"¹Le Alii e, o ai ea e nofo i lou fale fetafai? O ai ea e mau i lou mauga paia? ²O lē savali ma le amio sao, ma ua fai le amiotonu, ma tautala ma le faamaoni i lona loto..."* Na auai ma molimauna lenei sauniga fiafia e le afioga Taitaifono Fono Tele, susuga Iosefa Atapana Uilelea FT, faapea le aufaigaluega o le Pulega Apia Sisifo, le Tiakono Toeaina Matagaluega Apia, afioga Falasi'i Laauli Talauta Laupepa TT, ma le mamalu faalemalo i afioga Hon. Valasi Tafito, Minisita o le Matagaluega Soifua Maloloina, le afioga Hon. Lefau Harry Schuster, Minisita Matagaluega Leoleo, Falepuipui ma Fuimū, o aiga ma uo a le Ekalesia.

O le afioga i le faletua o le toeaina, Hana Efu na ia 'o'oti le lipine e tatala ai faitoto'a o le maota, ona tau'a'aoina atu lea e le afioga i le Matuaofaiva o ki o le maota, na taliaina mai e le tina matua o le Aulotu, le faletua ia Fu'a Boznanski, ma tatalaina ai loa ae ulufale le mamalu sa auai. O se galuega e tulaga ese foi lenei, ona o le susuga faafeagaiga ia Faatafa Nefu FS o ia lava lea le Matuaofaiva sa nafa ma le galuega, auā o lana lea taleni ma le agavaa na faameaalofa i ai le Atua. Na saunoa le afioga Taitaifono Fono Tele, susuga Iosefa A. Uilelea FT, e faafetaia le susuga Faafeagaiga, le Matuaofaiva ma lo latou aiga Salemalama, ma le paia o le Ekalesia i ona tulaga faalupea, ona o lo latou soifua faatuatua ma galulue faamalolosi mo le Atua ma le galuega o le Tala Lelei, o loo faamanatuina lona taunuu mai i Samoa i lenei masina. O la le Taitaifono, ua lafoia i lenei galuega, ataata o le feau faaleagaga mai le TFA o le vaiaso ma lea lava Aso Toonai – Tasi ia Keriso. Ua tino mai i lenei maota, le matagofie ma le maopoopo lelei o le agaga e tasi, le faatuatua ma le faamoemoe e tasi - ia ati a'e le Ekalesia mo le viiga o le Atua.

Ona ia tauaao lea o le meaalofo masani a le Ekalesia Aoa e \$10,000 mo galuega faapenei a Aulotu. Malo faafetai le faaea Ekalesia. O le susuga Hon. Laaulialemalietoa Leuatea se tasi o A'oa'o Fesoasoani a le Ekalesia na avea ma fofoga o le aso, e faafeiloa'i le mamalu o le aofia, e faafetaia le susuga Taitai o le Sauniga, ma agatonuina le saunoaga a le afioga Taitaifono Fono Tele. Na ia faaleoina foi faamanuiaga mai le susuga Dr. Featuna'i Liuaana FS ma le faletua ia Perise, ma le EFKS Sandringham Aukilani, faatasi ma la latou meaalofo e \$10,000. O le Ekalesia lea na fofoa ma faafailele ai le soifua faaleagaga o le Faletua ia Sinuanua, ma la'ua osi feagaiga ai ma le susuga Faatafa Nefu FS, le lupe lupe faalele mai le EFKS Vaiala.

O le tala o le galuega na saunoa i ai le tofa ia Letaa Dan Devoe. Sa ia mua'i faalauiloa le aufaigaluega sa nafa ma le galuega: Matuaofaiva-susuga Faatafa Nefu FS. Tusiata - Luke Waqabuli, Inisinia-Leiataua Isikiki Punivalu, Fai Eletise-Fu'e Peepee Vaa & Tumama Toomata, Palama-Faamanu Falaniko. O le aufaigaluega sa mafuli lava i tamalii ma failauga, o tiakono faapea alo ma fanau a le Ekalesia, lea ua maua lo latou silafia ma le poto masani, i le faasinoga a le susuga i le faifeau kamuta.

O le tupe sa i ai a le Ekalesia e \$60,000; o Aperila 2021 na fai ai le Tusiga Igoa maua ai le \$72,000. O alofaaga na maua mai Ipu o maliu a nisi o le Aulotu e \$11,000, o le meaalofo a le faafeagaiga ma le faletua e \$5,000, a o Lafoga o le Lotofuatiaifo 29 Aokuso na maua ai \$41,678. Sa talia le Nogatupe \$200,000 mai le NPF, e faamalumalu ai le Ekalesia Aoa. O le tau o le galuega sa ulua'i fuafuaina e \$285,000, peitai o nisi faaopoopoga mana'omia mo le faaleleia atili, na maua ai le tau atoa o le galuega e **\$357,308.12**. Na asiasi maimoa le mamalu o le aofia i le matagofie o le galuega, ona alo lea i le taumafataga ma fa'aaloaloga maualuluga o isi foi taulaga osi i le Atua. Malo faafetai, ia viia le Atua i lo outou soifua faatuatua, le soifua tautua ma le osi taulaga mo le Atua ma le Tala Lelei ia Iesu Keriso.

FAATAUTAIGA O LE GATAIFALE

“³Ona maliu a’e lea o ia i le tasi vaa, o le vaa lea o Simona.” Luka 5.

O le faatautaiga muamua: Ia valaaulia Iesu i totonu o lou sã. O le amataga tonu lena! I taimi uma! E leai se isi mea e sili atu ona tele lona sao i le manuia o lou olaga, nai lo le i ai pe leai o Iesu i lou soifuaga. A o i ai na o Peteru, sa ia fagota i le po atoa ma le ‘asa o lona faiva. A e ina ua ia valaaulia Iesu i totonu o lona vaa, sa ia maua ai i’ a e sili ona tele na te le’i maua muamua. O lenei, e lē soona faia e Iesu se vavega aunoa ma se faamoemoe. E masani ona Ia fa’aaogā ana faataoto e a’oa’o ma faailoa ai se a’oa’oga. O le mea lea ua tupu iinei, ua Ia a’oa’o mai ai ia te oe ma a’u le mea e ao ona fai pe a toilalo ma lē manuia, pe afai foi e lē ausia e lou taumafai aupito sili, le lelei e tataua ona oo i ai. Mo Peteru, o lona vaa o le meafaitino vaaia e faailoa mai lona olaga. Pe afai o oe o se fai faiva, o lou vaa o lau pisinisi lena! E maitauina le valaauina e Peteru o Iesu i totonu o lana pisinisi, ma fa’aaogā ai e Iesu e fai ma *tulaga* mo Lana galuega. O e sauni e fai e pei ona faia e Peteru? Afai o lea, o le a faamanuiaina lau pisinisi. O le upu moni, na te faamanuia soo se mea e te tuuina atu ia te Ia. Aisea e faagata ai i le vaa? Aisea e te lē tautino ai i le amataga, o le Atua na tuuina atu mea uma?

O le isi manatu lenei: o le aumaia o Iesu i totonu o lou vaa, e ave’eseina mai ai le fefe i faalētonu, ma le faaitiitia o le popole i taunuuga o soo se taumafaiga. Ina ua aumai e Peteru Iesu e ave ma ana pã’aga faa-faifaiva, sa maoa’e faai’uga e maua. Ma ia ‘auna ne’i e misia le faasologa. Na amata i le faa-avanoa e Peteru o lona vaa e fa’aaogā mo le faamoemoe o Iesu. Ona faamanuia lea e Iesu o le vaa o Peteru, ina ia aogā mo le tausiga ma faamalie ai manaoga uma o Peteru. Ua a’oa’o mai Iesu, *“³³Ia outou muamua ona saili le Malo o le Atua e sili i se isi lava mea, ma ia ola i le amiotonu, ona Ia tuuina atu lea o mea uma e te mana’omia.”* Mataio 6^{NLT}. Sa e maua lelei mai? **“O mea uma e te mana’omia.”**

“⁹Auā ua ofo o ia atoa ma i latou uma sa ia te ia, auā o le au i’a ua latou maua.” Luka 5.

O le faatautaiga e lua: E faananau le Atua i lou faaeaina. Na iloa e Peteru o Iesu o se faia’oga maoa’e ma e na te mafaia foi ona faamalolo i ma’i. A e o lea o le a ia a’oa’oina nei, ma na iloa, e finagalo Iesu ina ia e manuia i lau galuega o loo fai. Atonu o

Peteru ua i ai ni upega e sili ona lelei, ua ia umia se vaa fagota lelei, ma ua na silafia lelei le vaega o le sami e maua ai i’ a e tele. Ma o lana tupe maua e faalagolago i le tele o lona faiva. Peitai ina ua atoa le po o fagota e leai se i’ a sa maua, na faia ai e Peteru le gaioga e sili ona lelei o lona olaga: na ia aumaia Iesu ia a’afia i lana pisinisi!

Sa e iloaina e finagalo le Atua ia manuia au taumafaiga? E te lē mana’o ia manuia le taumafai o lau fanau? E faapena le Atua. O le fesili: e te aumaia le Atua ia oulua galulue? E avanoa lau pisinisi mo le Atua e galue ai i soo se taimi? E mafai ona oo atu o Ia i tagata e ala atu ia te oe?

E tele taimi tatou te taumafai ai e tuu eseese le faalelalolagi mai le faaleagaga; ua tatou vavae ese faalelei lo tatou olaga faa-Kerisiano mai a tatou galuega masani o le soifuaga. A e o le mafuaaga lena o le puipuia o le Atua mai lona faamanuia mai i lau pisinisi po o lau galuega. Pe afai e te iloa le mea lenei, ma o oe se tagata atamai, o le a amata ona e galue e tusa ma auala faalefaavae o le Tusi Paia. O se tasi lenei o ta’iala faaleAtua mo le manuia o pisinisi ma atina’e: *“⁸E lē te’a i lou gutu le Tusi o lenei tulafono, a ia mafaufau i ai i le ao atoa ma le po, ina ia e anaana e fai e tusa ma mea uma ua tusia ai; ona manuia ai lea ia te oe o lou ala, ona e manuia ai lea.”* Iosua 1. Ua fetalai le Atua, le Ofisa Sili o le lalolagi, *“¹⁷O a’u o le Alii, o lou Atua, o loo a’oa’o ia te oe i mea e aogā, o loo ta’ita’iina oe i le ala e te ui ai.”* Isaia 48. O le aso lenei, e te faia ai mo oe lena folafolaga!

“⁵a ona o lau fetalaiiga ou te tuu ifo ai le upega.” Luka 5.

O le faatautaiga e tolu: Ia felagolagoma’i ma le fuafuaga a le Atua ua fai mo lou olaga. *“⁴ona fetalai atu lea o ia ia Simona, ‘Ina tuutuu atu ia i le loloto, ma tuu ifo ai o outou upega e maua ai ni i’a’.* ⁵Ua tali mai Simona ia te ia, *‘Le Alii e, ua atoa le po ua tigaina ai i matou, e leai ni mea ua maua; a ona o lau fetalaiiga ou te tuu ifo ai le upega’.* ⁶Ua uma ona latou faia o lea mea, ona latou siomia lea o le au i’a tele lava, ua masae ai lo latou upega.”

Na a’oa’oina e Iesu le au soo i le ogasami e fagota ai, o le taimi e fagota ai, ma pe faapefea ona fagota. Ma e faapena ona Ia a’oa’oina foi oe ina ia e manuia i lou olaga. Peita’i e pei o Peteru, e i ai nisi taimi e

faalētonu muamua ai au fuafuaga, ona faato'ā e naunau lea e talia le fuafuaga a le Atua. Ma afai o le tulaga lena e i ai, o le a tuu oe e le Atua se'ia faalētonu. Ia maitau mai mea nei: (i) *E le'i finau Peteru ma Iesu, na ona ia usitai.* E tusa ma lona agavaa o se porofesa i le faifaiva, mata sa faapea ifo Peteru, 'Le Alii e, o ai lau susuga e te faatonu mai ai a'u i le faiga o le faiva?' Atonu foi e mafai ona faapea ifo lona mafaufau, afai e le'i maua se i'a i le po i le taimi e masani ona 'aina ai maunu, e mautinoa lava e augapiu se mea e maua i le mutigitigi o le susulu ifo o le la i luga o le sami. Peita'i e le'i faapea, e le'i finau Peteru, sa na o le usita'i lava. Ma e tatau ona foi ona tatou faia faapea. (ii) *E le'i faalogo i ona lagona.* E lē taumateina lona vaivai ma le gapelu mai le galuega sa fai i le po atoa. Peita'i e le'i fesili ifo, 'O le ā le aogā? Aiseā o le a saga fai ai pea?' Ua lē lima ta'ita'iina o ia e ona lagona, a e ua faatino le faatuatua i folafolaga a Keriso - ma o le i'uga e ofoofogia. Ma afai foi e tuu lou faatuatua ia Iesu i le asō, o le a Ia faia foi faapea mo oe.

“Ina tuutuu atu ia i le loloto, ma tuu ifo ai o outou upega e maua ai ni i'a”.

O le faatautaiga e fa: O fuafuaga a le Atua mo lou olaga e masani ona aofia ai ma lamatiaga. Aiseā? Auā e finagalo o Ia e te ola i le faatuatua. Aiseā, i sou manatu, na fai ai Iesu ia Peteru, 'Tu'utu'u atu ia i le loloto?' Auā o iina e maua i ai i'a lapopo'a. O le toatele o tagata e fa'aalu uma aso o latou olaga i ogasami papa'u o le soifuaga. E ola i le ta'eta'ealuga. E itiiti lava se loloto i o latou olaga; ua malilie lava e faaopeopea i autafa o le si'o, e lē taitai ona oo ane i mea e loloto ai le sami. Aiseā? Auā e sili atu ona saogalemū vai papa'u. E mafaufau ane faapea, 'Afai ou te alu i le loloto, atonu o loo i ai ni galu. Latou te lueina lo'u vaa ma sa'e ai. O le mea lea o le a ou nofonofa ai pea iinei i le papa'u, ma faataamilomilo solo ai.'

E seāseā ona tatou fia faasusū o tatou vae ona o lo tatou fefefe ina ne'i i'u ane ua lofia o tatou ulu i le vai. Tatou te faapea ane, 'Afai ou te matuā sogasogā i le tuuina atu o lo'u ola mo le Alii, e i'u ina Ia faia o a'u ma tagata taulāmua. E ono lē fiafia ai lo'u aiga. O le ā se tala a a'u uō o le a fai? A e faapefea pe afai e finagalo mai le Atua ou te faia se mea ou te lē gafatia?' Ona tatou malilie ai lava lea e nonofo pea i le papa'u – ma tatou misia ai le anoano o faamanuiaga.

E ao ona malamalama lelei: o le fuafuaga a le Atua mo lou olaga, o se fuafuaga *lelei*, o se fuafuaga e galue mo lou manuia (Jeremia 29:11-14). Ua fetalai mai o Ia, 'Avatu a'u i totonu o lou vaa. Ia ou auai faatasi ma oe i soo se mea e te alu i ai – i lau pisinisi, i lau galuega, i lou aiga, i lau faaipoipoga, i au tupe, i soo se vaipanoa o lou ola. Ia avea a'u ma faatonu folau o lou olaga. Lagolago mai i la'u fuafuaga ua fai, ona ou avatu lea o faamanuiaga ofoofogia mo oe, e te le'i mafaufauina.' Aiseā e te lē taliaina ai loa o Ia ma Lana Upu i le asō, ma amata ona e tula'i atu i le faatuatua?

“a ona o lau fetalaiiga ou te tuu ifo ai le upega”.

O le faatautaiga e lima: Ia tu ma ia mau i folafolaga a le Atua. I a latou ulua'i faatautaiga, sa faalagolago le au soo i lo latou poto masani ma le agavaa. A o le taimi nei, ua latou talitonu ma faalagolago i le folafolaga a Keriso: 'Ina tu'utu'u atu ia i le loloto, ma tuu ifo ai o outou upega e maua ai ni i'a'. O lenei, e le'i fetalai ma'oti Iesu, 'Peteru, afai ta te fagogota faatasi ma a'u, ou te polōmisi atu le mau e tele.' Sa le'i mana'omia e Ia, auā sa iloa e Peteru afai e fetalai atu Keriso ia te ia e fagota, ma toe ta'u atu le itu e tuu ifo ai le upega, o lona uiga e leai se avanoa o le a sisi a'e ai le upega e 'asa! Sa mautinoa e Peteru e galue le Alii. Sa ia mautinoa o le a faataunuu e le Alii ana folafolaga. Pe afai e te aumaia le auai o le Atua i totonu o lou sa, o le fuafuaga a le Atua i lou ulu, ma folafolaga a le Atua i lou loto, e lē mafai ona e faiaina.

Atonu e te faapea ane, 'Manuia tele, peitai e te lē iloa mai le tulaga o loo o'u i ai. O le taimi nei ua ou matuā toilalo lava i le faaputuga faafitauli o ma fesaga'i. O taimi faigatā o loo feagai nei ma lo'u olaga.' Pe afai o loo e faiaina i ou faafitauli, ia e faia le mea lenei: faitau lau Tusi Paia, saili se folafolaga patino mai le Atua, ona e faasaga lea i ai e fai mo oe. Amata ona e talitonu e galue le Atua, ona e lagonaina lea ma iloa le fafagaina e ana folafolaga o le faamoemoe fou mo oe ma le tulaga o loo e i ai. E lē avea lou lē mafai ona fo'ia lou faafitauli, e te faapea ai ua leai se fofō. O faiga paaga ma le Atua, o le faamanuiaina e amata i le taimi o le faiaina. O le uma ai o lou *aoina o le po atoa, e leai se mea e maua*, e aiā mai ai loa o Ia. O le faatautaiga mo oe i le asō – 'aua le faavaivai! Toe taumafai atili. A e i le taimi la lenei, fai faatasi ma Iesu i totonu o lou sa, ona e iloa lea o le eseese tele.

Ia manuia lou alo faiva i le aga atu i le faai'uga o lenei tausaga, ma ia viia le Atua i lau faatautaiga.

IA FUA MAI I FUA FAALEAGAGA

“¹O lo’u Tama o le galue fanua o ia....” Ioane 15.

O le ā se mea o finagalo ai le Atua mai ia te oe i lenei aso? O fua faaleagaga! Ma e lua ni mea o le a Ia faia ina ia maua mai ai nei fua mai lou olaga. *Muamua*, o le a Ia faasino atu ia te oe o amio, o faiā ma sootaga, o gaioiga ma galuega, o loo fai ma pupuni e faigatā ai ia te oe ona fua mai fua faaleagaga. E faasino atu ia te oe, ona Ia amata lea ona sele ese. A e peitai, faato’ā mafai e Ia ona fai lena galuega, pe afai e te faatagaina o Ia, pe a e tu’u ia te Ia le avanoa ma le pule na te fai ai lea galuega. *Lona lua*, o le a Ia fa’aali atu ia te oe o mea o loo latou miti’ia oe faaleagaga, ma latou taofia oe mai le fuaina atili mai o isi fua. Ona faapena foi lea ona Ia sele ‘ese o ia mea. Ma o Lana aga’ese sele e fiafia tele i ai o Ia, o Lana Upu, *“e sili atu lona ma’ai nai lo soo se pelu taufaama’ai itu e lua.”*

A o e faitauina Afioaga paia a le Atua, Na te sele ese le leaga ina ia ‘aua nei taofia ai le lelei. Ona Ia teuteu atili lea o le lelei ina ia ‘aua nei fai ma faalavelave i le lelei e silisili atu. O le faiga lea e faamalamalamaina ai le mafuaaga o Lona tuuina mai o taimi faigatā i lo latou olaga. O loo faaupu e le faifeau o James Merritt, “O tofotofoga ua na o ni selesaito mo le teuteuina i aao o le Galue Fanua faalelagi – o meafaigaluega na te fa’aaogā e vavae ese ai laau mamate, o lālā e lē fua, ma tātupu e mimitiina le sua, ina ia tatou mafai ona fua atili ma fua tele mai.”

“⁴Ia outou tumau ia te a’u, ma a’u ia te outou.”

E lē mafai e se lālā ona fua mai, i lona taumafai, i lona galue, i lona tautigā. E mafai ona ia fua mai, tau lava o lona ‘pipi’i tumau’. O le ā lona uiga? E faapefea ona e pipi’i tumau ia Iesu? O sina faatinoga faigofie e faamalamalama ai: pe afai e tuu se pepa lautī i totonu o se ipu vai vevela, e i ai le mea e tupu. A o tumau ai le pepa lautī i totonu o le vai, na te amata ona faamanogi ma suia le lanu o le vai seia oo ina aveva ma suātī. Ma o le umi e tumau ai le pepa lautī i totonu o le vai, o le faasolo foi lena o le malosi o le lanu ma le manogi o le suātī. O le mea lena e tupu pe afai e te tumau ia Keriso, o Ia foi i totonu ia te oe. O le umi o le taimi e te tumau ai ia te Ia, ma le loloto foi e te lua ola faatasi ai ma Ia, o le atili foi lena ona faasosolo o Lona soifua i totonu o lou ola.

E lē fuaina mai e le lālā ni fua; na te faatautauina mai. O le vine e fuaina mai fua. Ma ua fetalai mai Iesu,

“⁵O a’u o le vine, o lālā outou. O lē tumau ia te a’u, ma a’u ia te ia, o ia lava e fua tele mai; auā e lē mafaia e outou ona fai se mea e tasi, pe a’u lē i ai.” Aunoa ma le vine, e tutusa lelei lava le lālā e sili ona malosi ma le lālā e aupito vaivai. O le ā la le uiga o le tumau ia Keriso?

(i)..*Su’esu’e ma sailiili i Ana Afioaga. “⁷Afai tou te tumau ia te a’u, ma tumau a’u upu ia te outou.* O lou su’esu’e ma sailiili i afioaga a le Atua, e suia ai oe e Lona Agaga Paia.

(ii) *Usita’i i Lona finagalo. “¹⁰Afai tou te tausi i a’u poloaiga, tou te tumau i lo’u alofa.”* O le faamasani ma latalata atili o lou iloa o le Atua, o le atili foi lena ona e mana’o e fai ana poloaiga. Ma afai e te faia mea uma e fetalai mai ai o Ia, o le a amata loa ona e savali i ana faamanuiga.

O E UA FAI I LAGI LE FOLAUGA

FAAMAUSILI AUIMATAGI IOSUA COLLINS

7/3/1952 - 5/3/2021 (68+11+27)

Na soifua mai Faamausili Auimatagi Iosua Collins i le Aso Faraile, 7 Mati 1952, ae na faamānava ana feau e lona Matai i le Aso Faraile 5 Mati 2021, i le maota gasegase i Motootua. O le masina o Tesema i le 1990, na aloaia ai lo la tofi tiakono ma lona faletua o Leilani. Sa galulue muamua i le Ekalesia PIPC i Petone, Ueligitone. O le isi lea aiga o le to’a 41 o ē na faamavae mai le PIPC, ma latou faatū le aulotu EFKS lenei i Lower Hutt, ma le Susuga ia Senetenari ma Rosetta Iupeli (FT Penisione). Sa faapaiaina e le Susuga i le Toeaina ia Tavita Talamaivao FT (ua maliu) i le sauniga lotu sa faia i le malumalu o le St James Anglican Church i Lower Hutt, i le aso 1 Tesema 1990. O lona suafa sa amata mai ai i le galuega o Auimatagi Iosua Collins, ma e maliu o ia o galue lava i lona tofi Tiakono.

O se tala otooto o lona soifua galue:

1. O Tofiga i le Ekalesia aoao sa tofia ai o ia:— 2000: Usufono Tiakono i le Fono Tele i Malua; 2002 – 2005: Sui Tiakono a le Matagaluega i le Komiti o Atinae a le Ekalesia aoao; 2013: Usufono Tiakono i le Fono Tele i Malua.

O E UA FAI I LAGI FOLAUGA

FAAMAUSILI AUIMATAGI IOSUA

COLLINS

2. O Tofiga sa ia tauaveina i totonu o le aulotu:– 1996 – 2000: Sui Fofoga o le aulotu; 2001 – 2016: Fofoga o le aulotu; 1996 – 2017: Ta’ita’ipese.

O le isi tiute taua sa tauave e le tiakono ma le faletua, o le saunia lea o le areto ma le uaina o le faamanatuga i masina ta’itasi. O se auaunaga ma te oo mai i le galuega i le 2016, o la faatinoina pea ma le fanau, seia oo ina faamavae mai o ia i le tausaga 2018; ua faasolo nei i le afaigaluega tiakono lea matafaiioi faa-tiakono.

O le Aso Toonai, aso 2 Novema 2019, na tuuina atu ai le mataupu a lenei aulotu i le Tofiga a le Pulega, ina ia faamauina le suafa Faamausili Auimatagi Iosua Collins. Sa valaau o ia i lona suafa o Auimatagi, a o lona finagalo, e fia fa’aaogā lona suafa Faamausili, ma sa faapea ona talia.

O le faaiuga lava o le 2019, na malaga ai Faamausili ma le faletua i Samoa, ona o nisi o ona tiute faa-le-aiga. O nafa sa faa-aiga lua ai le tiakono i le tele o taimi; o Samoa i se vaiaso, masina po o ni masina, ona toe talii mai foi lea i le galuega iinei. O le aso 13 o Mati 2021, faatoa ma toe feiloai ai ma Faamausili, ina ua molimoli mai lona maliu, ua faamānava e le Atua ana feau. Na ou taitaiina le sauniga ma le fanau sa faafeiloai ai le foi mai a le tiakono i le fale maliu o Gee & Hickton i Lower Hutt, ona taoto ai lea o ia se’i tālia le uma o aso e 14 sa faanofosea ai le faletua, e tusa ma tulafono o le KOVITI-19. Talofa e, ua le o se tofā i le faletua ma le nofo-a-alo po o so tatou loto, a o le finagalo fai toatasi o le Atua.

O lona sauniga faa-le’āiga (*family service*) sa faia i le malumalu EFKS i Hutt Valley i le itula e 5.00 i le afiafi o le Aso Lulu 31 Mati 2021. Sa ou ta’ita’i, faitau Tusi Paia Niue Fereti (AF) ma Tofiomavaega Tuisamoa (AF), a o Muaau V McCarthy (AF) sa tatalo.

Na molimau le fanau ma aiga ma uo i le soifua o le auauna. O se tamā alofa lē faatuaioi ma le osi aiga lelei. Sa molimau foi le fanau i le filigā o le tamā i ona tofi i totonu o le Ekalesia, ma sa tata’i uma atu ai lava i latou ma le tina i mea uma sa naunau le tamā e faataunuu. Sa fiafia tele i le taaloga lakapi, ma sa taumulimuli solo ai e tapua’i taaloga a le fanau i lenei lava faagātama.

O le 10.00 i le taeao o le Aso Tofi, 1 Aperila 2021, na faia ai lona toe sauniga i le malumalu o le EFKS i Lower Hutt. Sa ta’ita’i le Toeaina, Faatulituli Setu (FT), ae sa ou momoli mai le sā o Faamausili i le malumalu. Sa tatalo Utupo Iputau (FS), ae faitau Tusi Paia ma lauga Vaega’au Liko (FS). Sa molimau Iosefa Collins e fai ma sui o le tina ma le fanau, ae ou faia le molimau o le soifua faa-le-agaga o le auauna.

O le upu moni, e lē lava upu e faamatala ai le tāua ma le tele o le auaunaga a lenei uso ma le tamā mo le Ekalesia, faapea ma lona aiga . Sa toe faamamafa foi e Iosefa le alofa o le tamā ia te i latou le fanau, ae maise o le tinā ia Leilani. Sa naunau foi e fai mea lelei mo le manuia o ō la aiga ma le tinā. O la ma vaai faafaiifeau ma lo’u toalua, o se auauna fa’aaloalo i le au faigaluega. Sa toaga i le lotu ma galuega fai a le Ekalesia. O se tamā finau, e ui sa le’i talia e le toatele nisi o itu sa ia naunau i ai, ae sa lē faavāivāi i lona talitonuga, o le mea sili lea mo le Atua. “*Le auauna lelei e ma le faamaoni, ulufale mai ia i le fiafia o lou Alii.*”

Na faai’u i lona falelauasiga, sa ou ta’ita’iina i le fanua maliu o le Taita Cemetery, ma faamavae atu ai i le pese faatofa a le au Kerisiano: TALOFA USO E, TOFAINA OE!! Faafetai Faamausili mo lou soifua galue. Ia fai lea ma ta’iala lelei mo le fanau ma i matou o e o loo fa’aaunauina le galuega.

O la Iesu: “Amuia ē ua oti, o ē ua oti o i le Alii, e amata i nei ona po.” “O lea lava,” ua fetalai mai ai le Agaga, “ina ia latou malolo i ā latou galuega tiga; auā foi o ā latou galuega e mulimuli ia te i latou.” “*Blessed are the dead who from now on die in the Lord.*” “*Yes,*” says the Spirit, “*they will rest from their labours, for their deeds follow them.*” (Fa’aaliga 14:13). SOIFUA ONA O IESU.

Saunia e Rev. Oliva Tiai (FS)


EFKS Lower Hutt

Pulega a Ueligitone i Saute

Matagaluega LAUMUA O AOTEAROA

ATA O NISI MATAUPU LOMIA

FAAMAUSILI AUMATAGI IOSUA COLLINS (O LĒ UA FAI LAGI)



FAAFEAGAIGA/MATUA O FAIVA EFKS ALAMAGOTO



Faatafa Nefu FS & Sinuanua

TALA MAI NISI ITU O LE EKALLESIA

MAI LE EFKS MANASE

O le aso 27 Iulai 2021 na tatala aloaia ai le Feagaiga a le EFKS Manase, Pulega Gagaifomauga, Itu o Tane, ma la latou faifeau, le susuga Filipino Vili FS ma le faletua ia Vaialisi. O le ta'ita'i o le sauniga - susuga Tanielu Apineru FT, faitau Tusi Paia - Lauititi Vaega FS, tatalo - Mani Nepo FS, lauga - Penaia Europa FS. O le afioga Taito Filisi sa fai ma sui o le Ekalesia, a o Alesana Afamasaga FS (sui Failautusi Pulega) na molimau, ua atoa le tausaga talu ona tuua le galuega e le faifeau mo sailiga togafiti i Niu Sila (ina ua mae'a le faapaiaina o le malumalu fou ia Iuni 2020). O le mafuaaga lea na fautuaina ai se tofa i le susuga Toeaina ma le Aufaigaluega, ina ia tatala le feagaiga, ma sa finagalo malie foi i ai le faifeau na auai mai i le sauniga, e ala i uepa tafailagi (zoom). E \$10,000 le meaalofoa a le Pulega, a o le Mafutaga Tina Pulega e NZ\$2,000. O Filipino Vili FS e atoa i ai le 15 o faifeau i lenei Aulotu, sa sui mai i la'ua i le susuga Siueva Gogo FT ma Faailoga, le sa avea ma Taitaifono Fono Tele 2001-2005 ae maliu ia Iuni 2013.

MAI LE EFKS LALOMANU

Ole masina talu ai na faia ai le filifiliga a le EFKS Lalomanu Aleipata, i le afio o le Tuiatua Faanofonofu, le Falefia o Alii, le mamalu o le Faletolu, le Tootoo ma Saleaamua, mo so latou faifeau. Ua tasi ai le faatofalaiga paia a le Aulotu i le susuga Vaai Tua FS, o le faifeau o loo galue i le Vaega Faamisionare i le Ofisa Tutotonu o le Ekalesia, e avea mo latou tofi. O le susuga Vaai ma le faletua ia Niukini na i'u mai le Kolisi Malua i le tausaga 2015, ma amata galue i le Ofisa Tutotonu i le tausaga 2017. Na faauuina i le tofi Faifeau Samoa (FS) i le tausaga 2019. O le faifeau ma le faletua o lupe faalele a aiga, afioaga ma Ekalesia i Matautu, Gagaifo, Faleseela Lefaga, faapea Afega ma Fagalii. O le masina o Mati i le tausaga nei na tatala ai le feagaiga ma lē sa tausia le galuega talu ai. Ua faamoemoe a tusa ma le finagalo o le Atua aulia le masina o Tesema, ona faataunuu lea o le sauniga o le osiga feagaiga. Talosia le alofa o le Atua e aulia manuia lea aso taupoina, ma ia faataunuu manuia le faamoemoe lelei o le faifeau ma le faletua.